

ЎЗБЕКИСТОН РЕСПУБЛИКАСИ ПРЕЗИДЕНТИНИНГ
ҚАРОРИ**728 Ўзбекистон Республикаси Президенти ҳузуридаги
Лойиҳа бошқаруви миллий агентлиги фаолиятини
ташкил этиш тўғрисида**

Ўзбекистон Республикаси Президентининг 2017 йил 24 июлдаги «Ўзбекистон Республикасида лойиҳа бошқаруви тизимини жорий этиш чора-тадбирлари тўғрисида»ги ПФ–5120-сон Фармонига мувофиқ:

1. Қўйидагилар:

Ўзбекистон Республикаси Президенти ҳузуридаги Лойиҳа бошқаруви миллий агентлиги бошқарув ходимларининг чекланган сони 164 нафар бўлган тузилмаси 1-иловага мувофиқ;

Ўзбекистон Республикаси Президенти ҳузуридаги Лойиҳа бошқаруви миллий агентлиги тўғрисидаги низом 2-иловага мувофиқ тасдиқлансин.

2. Ўзбекистон Республикаси Президенти ҳузуридаги Лойиҳа бошқаруви миллий агентлиги (кейинги ўринларда Агентлик деб юритилади) директори:

зарурат бўлганда, бошқарув ходимларининг белгиланган штатлар сони ва меҳнатга ҳақ тўлаш фонди доирасида Агентлик тузилмасига ўзгартиришлар киритиш;

Агентликка юклатилган вазифаларни бажариш доирасида давлат органлари, хўжалик бошқаруви органлари, давлат корхоналари ва ташкилотлари (кейинги ўринларда давлат органлари ва бошқа ташкилотлар деб юритилади), нодавлат нотижорат ташкилотлар, етакчи лойиҳа институтлари, илмий-таълим муассасалари, шунингдек, халқаро ташкилотлар, чет эл компанияларининг юқори малакали ходимларини ва мутахассисларни маслаҳатчилар сифатида жалб этиш ҳуқуқи берилсин.

3. Белгилаб қўйилсинки:

Агентлик юридик шахс ҳуқуқига эга давлат муассасаси ҳисобланади ва ўз фаолиятида Ўзбекистон Республикаси Президентига ҳисобдордир;

Агентликни сақлаб туриш Ўзбекистон Республикасининг Давлат бюджети маблағлари ва қонун ҳужжатларида тақиқланмаган бошқа маблағлар ҳисобидан амалга оширилади.

4. Агентлик директори икки ой муддатда:

Агентликнинг зарур назарий билим ва амалий тажрибага эга бўлган, Агентликка юклатилган вазифаларни профессионал даражада амалга оширишни таъминлайдиган юқори малакали мутахассислар билан тўлдирилишини;

Агентликнинг таркибий тузилмалари тўғрисидаги низомлар тасдиқланишини таъминласин.

5. Белгилаб қўйилсинки:

Агентликнинг фаолият соҳаси давлат органлари ва бошқа ташкилотлар,

давлат улуши 50 фоиздан ортиқ бўлган хўжалик жамиятлари, шунингдек, Ўзбекистон Республикаси Вазирлар Маҳкамаси мутасаддилик қиладиган хўжалик субъектларига нисбатан татбиқ этилади;

ислохотларни амалга ошириш натижаларини тизимли ўрганиш асосида Агентлик Ўзбекистон Республикаси Лойиҳа бошқарувининг ягона миллий ахборот тизимидан фойдаланган ҳолда давлат ва ҳудудий дастурлар, инвестиция лойиҳалари билан ўзаро боғлиқликда Ўзбекистон Республикаси инвестиция дастурлари шакллантирилиши ва амалга оширилишининг назорати ҳамда мониторингини амалга оширади;

Агентлик зиммасига юклатилган вазифаларни бажаришда давлат органлари ва бошқа ташкилотлар, нодавлат нотижорат ташкилотлар, етакчи лойиҳа институтлари, илмий-таълим муассасалари, тадбиркорлик субъектлари, шунингдек, халқаро ташкилотлар, чет эл компаниялари ҳамда мутахассислари билан ўзаро ҳамкорлик қилади;

Агентлик лойиҳа ишлари ва давлат харидларини такомиллаштириш, Ўзбекистон Республикасининг инвестиция муҳитини яхшилаш масалалари бўйича давлат органлари ва бошқа ташкилотлар, шунингдек, бизнес-ҳамжамиятнинг эксперт ишчи гуруҳлари ишини ташкил этади ва мувофиқлаштиради;

Агентликнинг фаолият соҳасига кирувчи масалалар бўйича норматив-ҳуқуқий ҳужжатлар лойиҳалари Агентлик билан мажбурий тартибда келишилиши шарт.

6. Агентлик ҳамда Ўзбекистон Республикаси Ахборот технологиялари ва коммуникацияларини ривожлантириш вазирлиги бошқа манфаатдор вазирлик ва идоралар билан биргаликда илғор хорижий тажрибани инобатга олган ҳолда:

бир ой муддатда Ўзбекистон Республикаси Лойиҳа бошқарувининг ягона миллий ахборот тизимини ташкил қилиш ва жорий этиш концепциясини;

бир ой муддатда Ўзбекистон Республикаси Лойиҳа бошқарувининг ягона миллий ахборот тизими доирасида лойиҳа ва техник ҳужжатлар, дастурий маҳсулотлар ишлаб чиқиш, аппарат-дастурий комплекслар ўрнатиш ва жорий этишни амалга оширувчи Давлат ахборот тизимларини яратиш ва қўллаб-қувватлаш бўйича ягона интеграторни ташкил этиш ҳақидаги норматив-ҳуқуқий ҳужжат лойиҳасини;

икки ой муддатда Ўзбекистон Республикаси Лойиҳа бошқарувининг ягона миллий ахборот тизимини ташкил қилиш ва жорий этиш бўйича лойиҳа ҳамда техник ҳужжатларни;

икки ой муддатда давлат ахборот тизимларини ташкил қилиш, ишлаб чиқиш ва жорий этиш қийматини баҳолаш тартибини ишлаб чиқсин ва белгиланган тартибда киритсин;

республика ижтимоий-иқтисодий ривожланишининг тизимли таҳлили ва прогнозини амалга ошириш имконини берувчи, давлат ва бошқа ахборот тизимлари билан интеграция қилинган Ўзбекистон Республикаси Лойиҳа бошқарувининг ягона миллий ахборот тизимини 2019 йил 1 январга қадар муддатда ишга туширилишини таъминласин.

7. Қуйидагилар:

чет эл инвесторларининг маблағлари билан бирга марказлашган капитал қўйилмалар, шунингдек, халқаро ва хорижий молия институтларининг кредитлари, заёмлари, грантлари — Ўзбекистон Республикаси Лойиҳа бошқарувининг ягона миллий ахборот тизимини ташкил қилиш, жорий этиш ва техник қўллаб-қувватлашни;

давлат органлари ва бошқа ташкилотларнинг ўз маблағлари — давлат органлари ва бошқа ташкилотларнинг ахборот тизимларини Ўзбекистон Республикаси Лойиҳа бошқарувининг ягона миллий ахборот тизимига интеграция қилиш ва мослаштиришни молиялаштиришнинг манбалари этиб белгилансин.

8. Белгилаб қўйилсинки:

2018 йил 1 январдан бошлаб Агентлик Ўзбекистон Республикаси Давлат бюджети, давлат мақсадли жамғармалари, Ўзбекистон Республикаси томонидан жалб этиладиган хорижий кредитлар, заём ва грантлар маблағлари ҳисобидан амалга ошириладиган давлат ва ҳудудий дастурлар, инвестиция лойиҳалари билан ўзаро боғлиқликда Ўзбекистон Республикаси инвестиция дастурлари бўйича хулосалар беради;

2019 йил 1 январдан бошлаб Ўзбекистон Республикаси инвестиция дастурлари, давлат ва ҳудудий дастурлар, инвестиция лойиҳалари шакллантирилиши ва амалга оширилишини назорат ҳамда мониторинг қилиш Агентлик томонидан Ўзбекистон Республикаси Лойиҳа бошқарувининг ягона миллий ахборот тизимидан фойдаланган ҳолда амалга оширилади.

9. Агентлик ҳамда Ўзбекистон Республикаси Ахборот технологиялари ва коммуникацияларини ривожлантириш вазирлиги Иқтисодиёт вазирлиги, Молия вазирлиги, Адлия вазирлиги, Давлат архитектура ва қурилиш қўмитаси, Инвестициялар бўйича давлат қўмитаси, Хусусийлаштирилган корхоналарга қўмаклашиш ва рақобатни ривожлантириш давлат қўмитаси, Ҳисоб палатаси, «ЎЗИнжиниринг» Республика лойиҳа институти билан биргаликда илғор хорижий тажрибани инobatга олган ҳолда:

уч ой муддатда лойиҳа олди ҳужжатларни ишлаб чиқишдан бошлаб лойиҳалар амалга оширилишини якунлашгача бўлган лойиҳа бошқаруви жараёнининг барча босқичларини тартибга солишни назарда тутувчи Ўзбекистон Республикаси Президенти қарори лойиҳасини;

икки ой муддатда Ўзбекистон Республикаси инвестиция дастурлари, давлат ва ҳудудий дастурлар, инвестиция лойиҳаларини ишлаб чиқиш ва тасдиқлашнинг амалдаги тизимини танқидий ўрганиш якуни бўйича уларни шакллантириш тартибини такомиллаштириш бўйича норматив-ҳуқуқий ҳужжат лойиҳасини ишлаб чиқсин ҳамда белгиланган тартибда киритсин.

10. Ўзбекистон Республикаси Лойиҳа бошқарувининг ягона миллий ахборот тизимини ташкил қилиш, жорий этиш ва самарали эксплуатация қилиш юзасидан тадбирларнинг ўз вақтида ва сифатли бажарилиши бўйича Агентлик директори ҳамда Ўзбекистон Республикаси ахборот технологиялари ва коммуникацияларини ривожлантириш вазири зиммасига шахсий жавобгарлик юклансин.

11. Ўзбекистон Республикаси Молия вазирлиги Агентлик фаолиятини, шу жумладан, Ўзбекистон Республикаси Лойиҳа бошқарувининг ягона миллий ахборот тизимини эксплуатация қилишни молиялаштиришга маблағларни асослантирилган ҳисоб-китоблар бўйича 2017 йил 1 августдан бошлаб ажратсин ҳамда ҳар йили Ўзбекистон Республикасининг Давлат бюджети харажатларида назарда тутсин.

12. Ўзбекистон Республикаси Хусусийлаштирилган корхоналарга кўмаклашиш ва рақобатни ривожлантириш давлат қўмитаси ҳамда Тошкент шаҳар ҳокимлиги икки ҳафта муддатда Агентликни унга юклатилган вазифаларни бажариш учун зарур бўлган бино билан таъминласин.

13. Ўзбекистон Республикаси Ахборот технологиялари ва коммуникацияларини ривожлантириш вазирлиги Агентликни белгиланган тартибда зарур алоқа воситалари, шу жумладан, ҳукумат алоқаси билан таъминласин.

14. Ўзбекистон Миллий телерадиокомпанияси ва Миллий ахборот агентлиги Ўзбекистон Республикаси Лойиҳа бошқарувининг ягона миллий ахборот тизимини жорий этиш бўйича амалга оширилаётган ишларнинг оммавий ахборот воситаларида кенг ёритилишини ташкил қилсин.

15. Агентлик ва Ўзбекистон Республикаси Адлия вазирлиги бошқа манфаатдор вазирлик ва идоралар билан биргаликда 2017 йил 1 сентябрга қадар муддатда:

қонун ҳужжатларига ушбу қарордан келиб чиқадиган ўзгартиш ва қўшимчалар тўғрисида Вазирлар Маҳкамасига таклифлар киритсин;

идоравий норматив-ҳуқуқий ҳужжатлар мазкур қарорга мувофиқлаштирилишини таъминласин.

16. Мазкур қарорнинг ижросини назорат қилиш Ўзбекистон Республикасининг Бош вазири А.Н. Арипов ва Ўзбекистон Республикасининг Бош прокурори И.Б. Абдуллаев зиммасига юклансин.

**Ўзбекистон Республикаси
Президенти**


Ш. МИРЗИЁЕВ

Тошкент ш.,
2017 йил 27 июль,
ПҚ-3150-сон

Ўзбекистон Республикаси Президентининг
2017 йил 27 июлдаги ПҚ–3150-сон қарорига
1-ИЛОВА

728-МОДА

Ўзбекистон Республикаси Президенти ҳузуридаги Лойиҳа бошқаруви миллий агентлигининг ТУЗИЛМАСИ



Ўзбекистон Республикаси қонун ҳужжатлари тўғрисида, 2017 й.

Ўзбекистон Республикаси
Президентининг 2017 йил 27 июлдаги
ПҚ-3150-сон қарорига
2-ИЛОВА

**Ўзбекистон Республикаси Президенти ҳузуридаги
Лойиҳа бошқаруви миллий агентлиги тўғрисида
НИЗОМ**

1-боб. Умумий қоидалар

1. Ушбу Низом Ўзбекистон Республикаси Президенти ҳузуридаги Лойиҳа бошқаруви миллий агентлигининг (кейинги ўринларда Агентлик деб юритилади) мақоми, асосий вазифалари, функциялари, ҳуқуқ ва мажбуриятлари, фаолиятининг ташкилий асосларини белгилайди.

2. Агентлик ўз фаолиятида Ўзбекистон Республикаси Президентига ҳисобдордир.

3. Агентлик юридик шахс ҳуқуқига эга давлат муассасаси ҳисобланади, Ўзбекистон Республикаси Давлат герби тасвирланган ва ўз номи ёзилган муҳр ва бланкага, Ўзбекистон Республикаси Молия вазирлигининг Ғазначилигида ғазна ҳисоб рақамларига эга бўлади.

4. Агентлик ўз фаолиятида Ўзбекистон Республикасининг Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, ушбу Низом ва бошқа қонун ҳужжатларига амал қилади.

5. Агентлик зиммасига юклатилган вазифаларни бажаришда давлат органлари, хўжалик бошқаруви органлари, давлат корхоналари ва ташкилотлари (кейинги ўринларда давлат органлари ва бошқа ташкилотлар деб юритилади), нодавлат нотижорат ташкилотлар, етакчи лойиҳа институтлари, илмий-таълим муассасалари, тадбиркорлик субъектлари, шунингдек, халқаро ташкилотлар, чет эл компаниялари ва мутахассислари билан ўзаро ҳамкорлик қилади.

6. Агентликнинг ўз ваколатлари доирасида қабул қилган қарорлари мулкчилик шакли ва идоравий бўйсунушидан қатъи назар, давлат органлари ва бошқа ташкилотлар, хўжалик юритувчи субъектлар, жисмоний шахслар томонидан бажарилиши мажбурий ҳисобланади.

2-боб. Агентликнинг асосий вазифалари ва функциялари

7. Қуйидагилар Агентликнинг асосий вазифалари ҳисобланади:

Ўзбекистон Республикаси Лойиҳа бошқарувининг ягона миллий ахборот тизимини (кейинги ўринларда Ягона миллий ахборот тизими деб юритилади) яратиш, жорий этиш ва эксплуатация қилиш;

Ўзбекистон Республикаси Давлат бюджети, давлат мақсадли жамғар-

малари, Ўзбекистон Республикаси томонидан жалб этиладиган хорижий кредитлар, заём ва грантлар маблағлари ҳисобидан молиялаштириладиган давлат ва ҳудудий дастурлар, инвестиция лойиҳалари ишлаб чиқилиши ҳамда амалга оширилишининг самарадорлиги ва шаффофлигини ошириш;

ресурсларнинг ҳақиқий бозор қийматини шакллантириш ҳамда нотўғри техник топшириқ ва сметаларни юритишга йўл қўймаслик имконини берадиган ресурслар ягона миллий маълумотномасини юритиш;

давлат харидларини амалга ошириш учун ягона ахборот майдонини яратиш;

Ўзбекистон Республикаси Давлат бюджети, давлат мақсадли жамғармалари, Ўзбекистон Республикаси томонидан жалб этиладиган хорижий кредитлар, заём ва грантлар маблағлари ҳисобидан молиялаштириладиган лойиҳаларни сифатли ва ўз вақтида амалга оширишга қўмаклашишни таъминлаш, норентабелли ва самарадорлиги паст лойиҳаларни аниқлаш;

давлат органлари ва бошқа ташкилотларда замонавий технологияларни жорий этиш концепциялари ишлаб чиқилиши ва ҳар томонлама таҳлил қилинишини таъминлаш;

лойиҳаларни, шу жумладан, амалга ошириладиган лойиҳаларни коррупция ва бошқа суиистеъмолчиликлар аломатлари мавжудлиги юзасидан комплекс техник-иқтисодий таҳлил қилиш;

Ягона миллий ахборот тизими ишлашини таъминловчи замонавий ахборот-коммуникация технологияларини давлат органлари ва бошқа ташкилотларда жорий этиш;

лойиҳа бошқаруви соҳасида кадрларни ўқитиш ва уларнинг малакасини оширишга қўмаклашиш.

8. Агентлик ўзига юклатилган вазифаларга мувофиқ қуйидаги функцияларни амалга оширади:

а) Ягона миллий ахборот тизимини яратиш, жорий этиш ва эксплуатация қилиш соҳасида:

давлат органлари ва бошқа ташкилотларда фойдаланиладиган ахборот тизимлари, ахборот ресурслари ва маълумотлар базаларига интеграция қилишни назарда тутувчи Ягона миллий ахборот тизимини ягона технологик ёндашув асосида шакллантиради;

Ягона миллий ахборот тизимини юритиш тартибини белгилайди;

Ягона миллий ахборот тизимига функционал талабларни белгилайди, техник топшириқларни ишлаб чиқади, лойиҳа фаолияти иштирокчиларини тизим билан ишлашида функционал бошқариш ва ўқитишни амалга оширади;

Ягона миллий ахборот тизимининг ишлаб чиқилиши, жорий этилиши, эксплуатация қилиниши ва узлуксиз ишлашини таъминлайди;

Ягона миллий ахборот тизимининг хавфсизлигини таъминлаш чораларини кўради;

Ягона миллий ахборот тизими — Ягона электрон ҳужжат айланиши, Электрон ҳукумат, Давлат харидлари ягона портали, Геоахборот тизими ва бошқаларнинг блокига талабларни белгилайди;

ахборот технологияларини жорий этиш ва ривожлантириш ҳолатини

баҳолайди, шу жумладан, лойиҳа бошқаруви жараёнида ахборот тизимлари ва ресурсларини жорий этиш самарадорлигини ўрганadi;

Ягона миллий ахборот тизимини самарали жорий этиш ва эксплуатация қилиш учун норматив-ҳуқуқий базани тизимли таҳлил қилади ҳамда уни такомиллаштириш бўйича таклифлар тайёрлайди;

Ягона миллий ахборот тизимини, шу жумладан, хорижий давлатларнинг илғор тажрибасини ўрганиш асосида ривожлантириш ва такомиллаштириш йўналишларини ишлаб чиқади;

давлат органлари ва бошқа ташкилотларнинг лойиҳа бошқаруви бўйича фаолиятни тартибга солувчи норматив-ҳуқуқий ва бошқа ҳужжатлари лойиҳаларини келишади;

б) Ўзбекистон Республикаси Давлат бюджети, давлат мақсадли жамғармалари, Ўзбекистон Республикаси томонидан жалб этиладиган хорижий кредитлар, заём ва грантлар маблағлари ҳисобидан молиялаштириладиган давлат ва ҳудудий дастурлар, инвестиция лойиҳалари ишлаб чиқилиши ҳамда амалга оширилишининг самарадорлиги ва шаффофлигини ошириш соҳасида:

лойиҳа бошқарувини амалга оширишни мувофиқлаштиради, назорат қилади ва унинг самарадорлигини баҳолайди ҳамда мазкур жараёнларни услубий жиҳатдан қўллаб-қувватлайди;

лойиҳа бошқаруви соҳасида миллий стандартларни ишлаб чиқади ва тасдиқлайди;

лойиҳа бошқаруви бўйича тадбирларни услубий жиҳатдан қўллаб-қувватлашни амалга оширади ҳамда давлат органлари ва бошқа ташкилотларнинг лойиҳа бошқаруви тизимларини ривожлантириш чораларини кўради;

лойиҳа бошқаруви гуруҳларини шакллантириш бўйича талабларни белгилайди ва уларнинг мақсадини келишади;

давлат харидлари ва лойиҳа бошқаруви соҳасида қайта алоқа, шикоят ва таклифларнинг таҳлилин аналга оширади;

навбатдаги йил учун Инвестиция дастурлари лойиҳалари бўйича ҳулосалар беради;

давлат ва ҳудудий дастурлар, инвестиция лойиҳаларининг амалга оширилишини мониторинг ва таҳлил қилади, уларнинг самарадорлигини баҳолайди;

илғор халқаро тажрибани инobatга олиб, ислохотларни амалга оширишнинг муаммолари ва яқунларини тизимли ўрганиш асосида, шу жумладан, Ягона миллий ахборот тизимидан фойдаланган ҳолда давлат ва ҳудудий дастурлар, инвестиция лойиҳалари ишлаб чиқилиши, жорий этилиши, амалга оширилишини ташкил қилади ҳамда мувофиқлаштиради, уларнинг назорати ва мониторингини амалга оширади;

в) ресурсларнинг ҳақиқий бозор қийматини шакллантириш ҳамда нотўғри техник топшириқ ва сметаларни юритишга йўл қўймаслик имконини берадиган ресурслар ягона миллий маълумотномасини юритиш соҳасида:

ресурслар ягона миллий маълумотномасига талабларни белгилайди, ре-

сурсларнинг (товарлар, ишлар ва хизматларнинг) ҳақиқий бозор қиймати-ни шакллантириш мақсадида унинг самарали ишлашини таъминлайди;

товарлар, ишлар ва хизматлар классификаторини шакллантирган ҳолда ҳар бир ресурс (товар, иш ва хизмат)ни ишлаб чиқарувчилар ва етказиб берувчилар билан маълумотларни автоматик тўплаш тартиб-таомилларини ташкил этади;

товарлар, ишлар ва хизматлар, шу жумладан, чет элда ишлаб чиқарилганлари ҳақидаги маълумотлар ва ахборотларнинг ресурслар ягона миллий маълумотномасида доимий янгиланишини таъминлайди;

ресурслар ягона миллий маълумотномасидан фойдаланган ҳолда давлат органлари ва бошқа ташкилотлар билан ўзаро ҳамкорликни ташкил этади;

г) давлат харидларини амалга ошириш учун ягона ахборот майдонини яратиш соҳасида:

давлат харидлари ягона ахборот портални яратиш бўйича ишларни мувофиқлаштиради ва бошқаради, давлат харидларини амалга оширишга талабларни белгилайди;

ресурслар ягона миллий маълумотномасининг давлат харидлари ягона ахборот портални билан интеграция қилинишини таъминлайди;

давлат харидлари жараёнларини мувофиқлаштиради, назорат қилади, услубий жиҳатдан қўллаб-қувватлайди ва баҳолайди, давлат харидларини самарали ташкил этишга тўсқинлик қилувчи сабаб ва шарт-шароитларни аниқлаш бўйича таҳлиллар ўтказиши, уларни бартараф этиш чораларини кўради;

давлат харидларини амалга ошириш тартибини такомиллаштириш бўйича таклифлар тайёрлайди, уларнинг амалга оширилишини таъминлайди;

инсофсиз товар, иш ва хизматлар етказиб берувчилар реестрини шакллантиришни ташкил этади, уларнинг давлат харидлари ягона ахборот порталига киришини чеклайди;

д) Ўзбекистон Республикаси Давлат бюджети, давлат мақсадли жамғармалари, Ўзбекистон Республикаси томонидан жалб этиладиган хорижий кредитлар, заём ва грантлар маблағлари ҳисобидан молиялаштириладиган лойиҳаларни сифатли ва ўз вақтида амалга оширишга кўмаклашишни таъминлаш, норентабелли ва самарадорлиги паст лойиҳаларни аниқлаш соҳасида:

давлат органлари ва бошқа ташкилотларда лойиҳа бошқарувини юритишга оид талабларни белгилайди;

инвестиция лойиҳаларини ишлаб чиқиш, экспертизадан ўтказиш ва ҳужжатларини тасдиқлаш тартибига мувофиқ тегишли экспертиза органлари томонидан ўз ваколатлари доирасида амалга ошириладиган инвестиция лойиҳалари ДТИА/ТИА, ДТИХ/ТИХни самарали, сифатли ва ўз вақтида экспертиза қилиш ишларини мувофиқлаштиради;

давлат органлари ва бошқа ташкилотларда лойиҳа фаолиятининг режалаштирилиши, жорий этилиши ва ривожланишига кўмаклашади;

Ўзбекистон Республикаси Ҳисоб палатаси билан биргаликда Ўзбекистон Республикасининг Давлат бюджети маблағлари, Инвестиция дастури

доирасида марказлашган капитал қўйилмаларга йўналтирилган, шу жумладан, Ўзбекистон Республикаси томонидан жалб этиладиган давлат мақсадли жамғармалари, хорижий кредитлар, заём ва грантлар маблағларидан самарали фойдаланилиши устидан тизимли назоратни амалга оширади;

лойиҳаларни рўёбга чиқариш жараёнининг тизимли таҳлили асосида хулосалар тайёрлайди ва уларнинг камчиликларни бартараф этиш учун лойиҳа бошқарув гуруҳларига юборади;

Ўзбекистон Республикаси Давлат бюджети, давлат мақсадли жамғармалари, Ўзбекистон Республикаси томонидан жалб этиладиган хорижий кредитлар, заём ва грантлар маблағлари ҳисобидан амалга ошириладиган давлат ва ҳудудий дастурлар тадбирлари молиялаштирилишини очиш учун хулоса беради;

лойиҳа бошқарув гуруҳлари раҳбарлари ва ижрочилари ишларининг сифатини баҳолайди ҳамда уларнинг эгаллаб турган лавозимига муносиблиги масаласини кўриб чиқиш ҳақида таклифлар киритади;

е) давлат органлари ва бошқа ташкилотларда замонавий технологияларни жорий этиш концепциялари ишлаб чиқилиши ва ҳар томонлама таҳлил қилинишини таъминлаш соҳасида:

илғор хорижий тажрибани ўрганиш асосида давлат органлари ва бошқа ташкилотларда замонавий технологияларни жорий этиш концепцияси ишлаб чиқилиши ҳамда ҳар томонлама таҳлил этилишини таъминлайди;

лойиҳа фаолиятини амалга оширишда лойиҳа бошқарувининг илғор услубларини ва тегишли ахборот технологияларини жорий этиш масалаларини кўриб чиқади;

ж) лойиҳаларни, шу жумладан, амалга оширилаётган лойиҳаларни коррупция ва бошқа суиистеъмолчиликлар аломатлари мавжудлиги юзасидан комплекс техник-иқтисодий таҳлил қилиш соҳасида:

техник регламентларни ва нарх (смета)ларни шакллантиришнинг амалдаги стандартларини таҳлил қилади ҳамда уларни такомиллаштириш бўйича таклифлар тайёрлайди;

таклиф этилаётган асбоб-ускуналар ва технологияларнинг техник ҳамда технологик кўрсаткичларига мос равишда инвестиция лойиҳаларининг қиймати ва иқтисодий жиҳатдан мақсадга мувофиқлигини баҳолайди;

инвестиция лойиҳаларини амалга ошириш доирасида техник ва технологик қарорлар бўйича оптималлаштиришда иштирок этади;

ўз ваколати доирасида аниқланган қонун ҳужжатлари талаблари бузилишини бартараф этишга қаратилган чораларни кўради, шунингдек, айбдор шахсларни жавобгарликка тортиш бўйича таклифлар киритади;

з) Ягона миллий ахборот тизими ишлашини таъминловчи замонавий ахборот-коммуникация технологияларини давлат органлари ва бошқа ташкилотларда жорий этиш соҳасида:

Ягона миллий ахборот тизими билан интеграция қилиш мақсадида давлат органлари ва бошқа ташкилотлар томонидан сотиб олинadиган ахборот тизимлари ва асбоб-ускуналар хусусиятларини ишлаб чиқишга техник топшириқларни келишади;

давлат органлари ва бошқа ташкилотлар фаолиятида ахборот-коммуникация технологияларини жорий этиш ва улардан фойдаланиш ҳолати ўрганилишини ташкил этади ҳамда мувофиқлаштиради;

ахборот тизимлари фойдаланувчиларини техник жиҳатдан қўллаб-қувватлайди ва уларга маслаҳатлар беради, ахборот тизимларини ишлаб чиқиш ва жорий этиш жараёнининг самарадорлигини ошириш, фойдаланувчиларнинг иш жойларида ахборот тизимларини жойлаштириш, ишлаб чиқиладиган ахборот тизимларининг сифатини таъминлаш чораларини кўради;

сервер таъминотининг аппарат қисмини созлайди, эксплуатацияга киритади ва ишлаб туришини таъминлайди, сервернинг функционал вазифасидан қатъи назар, оператив тизим даражасида серверларни, шунингдек, муайян сервер хизматлари ва функционал вазифалари бўйича унга илова-ларни бошқаради;

давлат органлари ва бошқа ташкилотларда лойиҳа бошқарув тизимининг жорий этилиши ва ишлаш даражасини мониторинг қилади;

и) лойиҳа бошқаруви бўйича кадрларни ўқитиш ва уларнинг малакасини оширишга кўмаклашиш соҳасида:

лойиҳа бошқаруви бўйича ўқув-услубий материалларни шакллантиради ва долзарблигини таъминлайди, уларнинг давлат органлари ва бошқа ташкилотларга етказилишини таъминлайди;

давлат органлари ва бошқа ташкилотларнинг ўзига хос хусусиятларини ҳисобга олувчи лойиҳа бошқаруви моделларини ишлаб чиқади;

лойиҳа фаолияти иштирокчилари — лойиҳа бошқаруви гуруҳлари учун лойиҳа ваколатлари тизимини ишлаб чиқади;

лойиҳа бошқаруви масалалари бўйича давлат органлари ва бошқа ташкилотлар мансабдор шахслари ҳамда ходимлари ўқишини ташкил этади;

лойиҳа бошқаруви соҳасида давлат органлари ва бошқа ташкилотлар ходимлари тажриба тўплаши ва касбий тайёргарлик даражасини ошириш, шунингдек, тегишли кадрлар захирасини шакллантириш бўйича ишларни мувофиқлаштиради;

кадрлар тайёрлаш ва қайта тайёрлаш, тингловчилар ўртасида лойиҳа бошқарув концепциясини оммалаштириш юзасидан қўшма тадбирларни ташкил этиш масалалари, ёш профессионалларни узоқ муддатли қўллаб-қувватлашни таъминлаш механизмларини ҳамда ўрта ва олий касбий таълим тизимини такомиллаштиришга оид тавсиялар ишлаб чиқиш бўйича таълим муассасалари билан ўзаро ҳамкорлик қилади;

ходимларнинг касбий аттестация тизими ривожланишига кўмаклашади, лойиҳа бошқаруви гуруҳлари ходимларининг касбий аттестациясини ўтказди;

лойиҳа бошқаруви соҳасида норматив-ҳуқуқий ҳужжатларни ва техник ҳужжатларни эълон қилади.

9. Агентлик, шунингдек, қуйидаги функцияларни амалга оширади:

амалдаги қонун ҳужжатлари ҳамда ҳуқуқни қўллаш амалиётини ҳуқуқий коллизиялар, такрорловчи ва коррупцияга оид нормаларни чиқариб ташлаш юзасидан танқидий таҳлил қилади, уларни бартараф этиш бўйича таклифлар киритади;

лойиха бошқаруви соҳасида норматив-ҳуқуқий ҳужжатларнинг ижроси устидан мониторинг ва назоратни таъминлайди;

стратегик миллий ташаббусларни шакллантириш орқали инвестиция иқлимини яхшилаш чораларини кўради;

эксперт бизнес ҳамжамияти билан биргаликда ишчанлик муҳити ва инвестиция иқлимини яхшилашга қаратилган қонун ҳужжатларини такомиллаштириш бўйича таклифлар тайёрлайди ҳамда Ўзбекистон Республикаси Президентига кўриб чиқиш учун киритади.

3-боб. Агентликнинг ҳуқуқ ва жавобгарлиги

10. Агентлик қуйидаги ҳуқуқларга эга:

давлат органлари ва бошқа ташкилотлардан Агентлик зиммасига юклатилган вазифаларни бажариш учун зарур бўлган материал ва маълумотларни белгиланган тартибда сўраб олиш;

давлат органлари ва бошқа ташкилотлар фаолиятида давлат ва ҳудудий дастурлар, инвестиция лойиҳалари амалга оширилиши масалалари бўйича текширишлар ўтказиш;

Агентлик зиммасига юклатилган вазифаларни бажариш доирасида давлат органлари ва бошқа ташкилотлар, нодавлат нотижорат ташкилотлар, етакчи лойиҳа институтлари, илмий-таълим муассасалари, шунингдек, халқаро ташкилотлар, чет эл компанияларининг юқори малакали ходимларини ва мутахассисларни жалб қилиш;

инвестиция лойиҳаларининг ДТИА/ТИА, ДТИХ/ТИХлари сифатли ишлаб чиқилиши ва экспертизадан ўтказилиши, шунингдек, ўз вақтида олдинга юритилишини таъминлаш масалаларини кўриб чиқиш учун ваколатли экспертиза органлари ва бошқа ташкилотларнинг ходимларини таклиф этиш;

белгиланган тартибда ноширлик фаолиятини амалга ошириш, ахборот материаллари, даврий нашрлар ва бошқа босма маҳсулотларни чиқариш ҳамда тарқатиш.

Агентлик қонун ҳужжатларига мувофиқ бошқа ҳуқуқларга ҳам эга бўлиши мумкин.

11. Агентлик ўзига юкланган вазифалар ва функцияларнинг самарали бажарилиши учун жавоб беради.

12. Агентлик ҳар ойда лойиҳа бошқаруви доирасида қуйидагиларни акс эттирадиган мониторинг натижаларини Ўзбекистон Республикаси Президентига кўриб чиқиш учун киритади:

инвестиция лойиҳаларини амалга оширишда аниқланган камчилик ва нуқсонлар ҳамда уларни бартараф этиш бўйича кўрилган чора-тадбирлар;

инвестиция соҳасидаги қонун ҳужжатларини такомиллаштириш орқали инвестиция иқлимини яхшилаш бўйича аниқ таклифлар;

Инвестиция дастури доирасида тақдим этилган имтиёз ва преференциялардан мақсадсиз ҳамда самарасиз фойдаланганлик бўйича аниқланган ҳолатлар;

давлат харидлари бўйича нархлар ошишининг олдини олиш юзасидан қилинган ишлар натижалари.

4-боб. Агентлик фаолиятини ташкил этиш

13. Агентликка Ўзбекистон Республикаси Президенти томонидан лавозимга тайинланадиган ва лавозимдан озод этиладиган директор раҳбарлик қилади.

14. Агентлик директорининг ўринбосарлари Ўзбекистон Республикаси Президенти билан келишилган ҳолда Агентлик директори томонидан лавозимга тайинланади ва лавозимдан озод этилади.

15. Агентлик директори мақоми, тиббий ва транспорт таъминоти шартлари бўйича Ўзбекистон Республикаси Президентининг Давлат маслаҳатчиси, директор ўринбосарлари эса Ўзбекистон Республикаси Президентининг Давлат маслаҳатчиси ўринбосарига тенглаштирилади.

Агентлик директори ва ходимлари меҳнатига ҳақ тўлаш шартлари Ўзбекистон Республикаси Лойиҳа бошқарувининг ягона миллий ахборот тизимини жорий этиш бўйича Мувофиқлаштирувчи кенгаш томонидан белгиланади.

16. Агентлик фаолияти Ўзбекистон Республикасининг Давлат бюджети маблағлари ва қонун ҳужжатларида тақиқланмаган бошқа маблағлар ҳисобидан молиялаштирилади.

17. Агентлик директори:

Агентлик фаолиятига умумий раҳбарликни амалга оширади ҳамда Агентликка юклатилган вазифа ва функцияларнинг бажарилиши бўйича шахсан жавоб беради;

зарурат бўлганда, бошқарув ходимларининг белгиланган штатлар сони ва меҳнатга ҳақ тўлаш фонди доирасида Агентлик тузилмасига ўзгартиришлар киритади;

Агентликнинг штатлар жадвали ва харажатлар сметасини тасдиқлайди;

Агентликнинг таркибий тузилмалари тўғрисидаги низомларни тасдиқлайди;

Агентлик ходимларининг лавозим вазифаларини тасдиқлайди;

Агентлик ходимларини белгиланган тартибда лавозимга тайинлайди ва лавозимдан озод қилади;

ўз ваколати доирасида Агентлик ходимлари томонидан бажарилиши мажбурий бўлган буйруқлар ва фармойишлар чиқаради ҳамда кўрсатмалар беради.

Директор қонун ҳужжатларига мувофиқ бошқа ваколатларни ҳам амалга оширади.